

## USVOJENI PRIJEDLOG

Na osnovu člana 41 stava 1. tačka c) Ustava Srednjobosanskog kantona ("Službene novine Srednjobosanskog kantona", broj: 1/97, 5/97, 6/97, 2/98, 8/98, 10/00, 8/03, 2/04, i 14/04 ),na prijedlog Vlade Srednjobosanskog kantona, Skupština Srednjobosanskog kanton na \_\_\_\_\_ sjednici, održanoj dana\_\_\_\_\_2008.godine, donosi:

### **ZAKON O VODAMA SREDNJOBOSANSKOG KANTONA**

#### **I. OSNOVNE ODREDBE**

##### **Član 1.**

##### **( Predmet Zakona )**

Ovim Zakonom o vodama Srednjobosanskog kantona, ( u daljem tekstu: Zakon ) u Srednjobosanskom kantonu ( u daljem tekstu: Kanton ) uređuju se pitanja u vezi s načinom i uvjetima upravljanja vodama i vodnim objektima, kao i druga pitanja značajna za zaštitu voda od štetnog djelovanja, zaštitu voda od zagađivanja, te korištenje voda, finansiranje upravljanja vodama, ovlaštenja i dužnosti kantonalnih organa, drugih pravnih lica i građana te pitanja za koja je Zakonom o vodama ( « Službene novine Federacije BiH », broj: 70/06 – u daljem tekstu: federalni zakon ) određeno da se uređuju kantonalnim zakonom o vodama.

##### **Član 2.**

##### **( Svrha Zakona )**

Svrha ovog Zakona je osiguranje upravljanja vodama s ciljem:

1. smanjenja zagađenja voda,postizanja dobrog stanja voda i sprječavanja degradacije voda
2. postizanja održivog korištenja voda,
3. osiguranja pravičnog pristupa vodama,
4. poticanja društvenog i privrednog razvoja,
5. zaštite ekosistema,
6. smanjenja rizika od poplava i drugih negativnih uticaja voda,
7. osiguranja učešća javnosti u donošenju odluka koje se odnose na vode i
8. sprječavanja i rješavanja sukoba u pogledu zaštite i korištenja voda.

## **II. OSNOVNA NAČELA I DEFINICIJE**

### **Član 3.**

#### **( Opšta načela i definicije )**

Vode su opšte dobro i kao takve su pod posebnom zaštitom Bosne i Hercegovine, Federacije, kantona, grada i općine.

Osnovna načela i definicije upotrebene u ovom zakonu imaju isto značenje, kao što imaju osnovna načela i definicije upotrebene u odredbama federalnog zakona.

## **III. RAZVRSTAVANJE POVRŠINSKIH VODA, VODNO DOBRO I VODNI OBJEKTI**

### **Član 4.**

#### **( Razvrstavanje i podjela površinskih voda i vodno dobro )**

Površinske vode na području Kantona prema značaju koji imaju za upravljanje vodama, razvrstavaju se u vode I. kategorije i vode II. Kategorije

Vode I. kategorije su:

Vodotoci:

1. Vrbas
2. Pliva

Vještačke akumulacije:

1. Jajce I
2. Jajce II

Sve preostale vode su vode II kategorije.

Ministarstvo za šumarstvo, poljoprivredu i vodoprivredu Srednjobosanskog kantona (u daljem tekstu:

Ministarstvo) utvrđuje granicu pojedinačnog vodnog dobra za površinske vode II. kategorije. Granica vodnog dobra upisuje se u zemljišni katastar.

### **Član 5.**

#### **( Javno vodno dobro )**

Javno vodno dobro za sve površinske vode II. kategorije u vlasništvu je grada, odnosno općine.

Upravljanje javnim vodnim dobrom vrše organi vlasti, pravne osobe i druge institucije, u obimu i na način propisan federalnim i ovim zakonom ili drugim aktima nadležnog organa kojima je preneseno pravo upravljanja javnim vodnim dobrom.

## **Član 6.**

Rješenjem ministra Ministarstva za šumarstvo, poljoprivredu i vodoprivredu ( u daljem tekstu: ministra) utvrđuje se pripadnost vodnog dobra javnom vodnom dobru za površinske vode II. kategorije, prema propisu iz člana 8.stav 1. federalnog zakona.

Javno vodno dobro ne može biti predmet prometa, ali može pod posebnim uslovima određenim federalnim zakonom ili na zakonu zasnovanom podzakonskom propisu, biti predmet ograničenog prava korištenja u obliku zakupa.

## **Član 7.**

Zemljišna čestica prestaje biti dijelom javnog vodnog dobra, ukoliko se rješenjem ministra iz člana 6. stava 1., utvrdi da ta čestica prestaje ispunjavati uslove vodnog dobra.

Status javnog vodnog dobra prestaje datumom upisa promjene statusa u zemljišne knjige, na osnovu donesenog rješenja iz stava 1. ovog člana.

## **Član 8.**

### **( Vodni objekti )**

Vodni objekti su objekti ili skupovi objekata, koji zajedno s pripadajućim uređajima, čine tehničku odnosno tehnološku cjelinu i služe za: zaštitu od štetnog djelovanja voda, zahvatanje voda radi njihovog namjenskog korištenja i zaštitu voda od zagađivanja.

## **Član 9.**

### **( Vrste objekata s obzirom na namjenu )**

Vodni objekti s obzirom na njihovu namjenu su:

1. zaštitni objekti – nasipi, obaloutvrde, uređena korita vodotoka, odvodni kanali, obodni (lateralni) kanali za zaštitu od vanjskih voda, odvodni tuneli, brane s akumulacijama, ustave, retenzije i drugi pripadajući objekti, kao i objekti za zaštitu od erozija i bujica;
2. objekti za odvodnjavanje- osnovna i detaljna odvodna kanalska mreža, crpne stanice za odvodnjavanje i drugi pripadajući objekti;
3. objekti za iskorištavanje voda za:
  - vodosnabdijevanje( izuzev za opću upotrebu voda) – brane i akumulacije, vodozahvati, bunari, kaptaze s odgovarajućom opremom, postrojenja za prečišćavanje vode za piće, rezervoari i cjevovodi i drugi pripadajući objekti,
  - snabdijevanje vodom privrednih subjekata- brane i akumulacije, dovodni kanali i tuneli, vodozahvatne građevine , crpne stanice, ustave, dovodna i razvodna mreža i drugi pripadajući objekti,

- navodnjavanje- brane i akumulacije, dovodni kanali i tuneli, vodozahvatne građevine, crpne stanice, ustave, dovodna i razvodna mreža i drugi pripadajući objekti i oprema.
  - korištenje vodnih snaga- brane i akumulacije, vodozahvati, dovodni i odvodni objekti i drugi pripadajući objekti i oprema,
  - ostale namjene- objekti za uzgoj riba, rekreacioni bazeni, jezera i dr.;
4. objekti za zaštitu voda od zagađivanja( u daljem tekstu: vodni objekti za zaštitu voda) - kolektori za prijem i transport otpadnih voda, postrojenja za prečišćavanje otpadnih voda, ispusti u prijemnik i drugi pripadajući objekti i oprema.
- Vodni objekti iz stava 1. ovog člana mogu imati istovremeno i više namjena- višenamjenski vodni objekti.

## **Član 10.**

### **( Vlasništvo nad objektima )**

Zaštitni vodni objekti iz člana 9. stav 1. tačka 1. ovog zakona na vodotocima koji pripadaju površinskim vodama II kategorije i uređena korita u urbanim područjima na površinskim vodama I kategorije u vlasništvu su grada i općine.

Grad i općina može pravo upravljanja i korištenja prenijeti u nadležnost drugih organa vlasti, pravnih lica ili drugih institucija, u obimu i na način propisan ovim zakonom ili aktima grada i općine.

Grad i općina je dužna da obezbjedi materijalne i organizacione uslove za održavanje objekata iz stava 1. ovog člana u funkcionalnom stanju i da se oni koriste u skladu sa njihovom prirodom i namjenom, kao i čuvanje od uništenja, oštećenja odnosno nenamjenskog korištenja.

Grad i općina donosi odluku o načinu korištenja i drugim pitanjima od značaja za održavanje i čuvanje objekata iz stava 1. ovog člana.

## **Član 11.**

Vodni objekti iz člana 9. stav 1. tačka 2. i 3. alineja 2, 3. i 5. ovog zakona koji su izgrađeni državnim sredstvima u vlasništvu su Kantona.

Vodni objekti iz člana 9. stav 1. tačka 3. alineja 1. i tačka 4. ovog zakona u vlasništvu su grada i općine.

Vlasnici vodnih objekata iz stava 1. ovog člana, pravo upravljanja i korištenja, mogu prenijeti na pravna lica osnovana propisima o komunalnoj djelatnosti.

Vodni objekti iz člana 9. stav 1. tačka 3. alineja 1. i tačka 4. ovog zakona, koje su za svoje potrebe izgradila pravna ili fizička lica u njihovom su vlasništvu i oni brinu o upravljanju tim objektima.

## **Član 12.**

Vodni objekti iz člana 9. stav 1. tačka 3. alineja 1. ovog zakona koji se nalaze na području dvije ili više općina Kantona odnosno dvije ili više općina na području Kantona i drugog Kantona u vlasništvu su Kantona odnosno Kantona i drugog Kantona, a vodni objekti koji se nalaze na području jednog grada ili općine vlasništvo su tog grada ili te općine.

Vodni objekti iz člana 9. stav 1. tačka 4. ovog zakona u gradskim ili općinskim centrima u vlasništvu su grada, odnosno općine.

Vlasnici vodnih objekata iz stava 1. i 2. ovog člana pravo upravljanja i korištenja mogu prenijeti na pravna lica osnovana prema propisima o komunalnoj djelatnosti.

Vodni objekti iz člana 9. stav 1. tačka 3. alineja 1. i tačka 4. ovog zakona što su ih za svoje potrebe izgradila pravna ili fizička lica u njihovom su vlasništvu i ona brinu o upravljanju tim objektima .

Vodni objekti iz člana 9. stav 1. tačka 3. alineja 1. ovog zakona koji služe za snabdijevanje vodom za piće naselja izvan gradskih, odnosno općinskih sjedišta su mjesni vodovodi i u vlasništvu su građana koji su ih izgradili za svoje potrebe i dužni su da iz cijene korištenja vode obezbjeđuju tekuće investiciono održavanje objekata mjesnog vodovoda, sredstva za amortizaciju i troškove propisanih pregleda o zdravstvenoj ispravnosti vode za piće.

Cijena vode isporučene iz mjesnog vodovoda ne može biti određena ispod iznosa koji osigurava pokrivanje troškova iz stava 5. ovog člana.

Vodni objekti iz člana 9. stav 1. tačka 4. ovog zakona na području izvan gradskih, odnosno općinskih sjedišta su u vlasništvu građana koji su ih izgradili za svoje potrebe i dužni su da obezbjede finansijske i organizacione uslove za održavanju funkcioniranje tih objekata.

## **Član 13.**

Vodni objekti iz člana 9. stav 1. tačka 3. alineja 4. ovog zakona u vlasništvu su pravnih ili fizičkih lica, koja su izgradile te objekte i one brinu o upravljanju tim objektima.

## **Član 14.**

Vlasnici odnosno korisnici vodnih objekata iz članova 9 do 13. ovog zakona dužni su objekte održavati u funkcionalnom stanju i koristiti ih u skladu sa njihovom prirodnom namjenom.

Vlasnik, odnosno korisnik vodnog objekta iz stava 1. ovog člana dužan je u slučaju prestanka upotrebe tog objekta, postupiti u skladu sa vodnim aktom, odnosno objekat održavati u stanju koje neće prouzrokovati štete režimu voda i trećim licima.

Ako vlasnik, odnosno korisnik ne održava vodni objekat u funkcionalnom stanju i ne koristi ga na način određen u stavu 1. ovog člana, kantonalna vodna inspekcija rješenjem nalaže potrebne mjere.

Vlasnik, odnosno korisnik vodnog objekta dužan je vodni objekat održavati i koristiti u skladu sa opštim aktom o održavanju, korištenju i osmatranju vodnog objekta i postupanju u slučaju kvara ili havarije na objektu.

Vlasnik, odnosno korisnik vodnog objekta dužan je brinuti o čuvanju vodnih objekata i uređaja na njima od slučajnog ili namjernog oštećenja ili uništenja.

Korisnik vodnih objekata iz člana 9. stav 1. tačka 1. ovog zakona nije odgovoran za štete trećim licima koje su nastale zbog neizgrađenosti ili nedovoljne osposobljenosti vodnih objekata.

#### **IV. UPRAVLJANJE VODAMA**

##### **Član 15.**

###### **( Upravljanje vodama )**

Upravljanje vodama na području Kantona je u nadležnosti Kantona, grada i općine, na način utvrđen federalnim i ovim zakonom.

###### **Teritorijalne osnove upravljanja vodama**

##### **Član 16.**

###### **( Vodna područja )**

Osnovna teritorijalna jedinica za upravljanje vodama je vodno područje. Područje Kantona u cjelini pripada Vodnom području rijeke Save.

#### **V. KORIŠTENJE VODA**

##### **Član 17.**

###### **( Korištenje voda )**

Korištenje voda prema ovom zakonu, obuhvata:

1. zahvatanje, crpljenje i upotrebu površinskih i podzemnih voda za različite namjene  
( snabdijevanje vodom za piće, sanitarne i tehnološke potrebe, navodnjavanje i dr.),
2. korištenje vodnih snaga za proizvodnju električne energije i druge pogonske namjene,
3. korištenje voda za uzgoj ribe,
4. korištenje voda za sport, kupanje, rekreaciju i druge slične namjene.

## Član 18.

### ( Osiguranje zdravstvene ispravnosti vode za piće )

Stalni i sistematski pregled vode i preduzimanje mjera za osiguranje zdravstvene ispravnosti vode za piće i tehničke ispravnosti uređaja u skladu sa ovim zakonom i federalnim zakonom, dužno je osigurati pravno lice koje obavlja djelatnost vodosnabdijevanja.

Izuzetno od stava 1. ovog člana, stalni sistematski pregled vode i preduzimanje mjera za osiguranje zdravstvene ispravnosti vode za piće i tehničke ispravnosti uređaja mjesnog vodovoda, dužna je osigurati **mjesna zajednica ili drugo pravno lice, grupa građana ili građanin.**

## VI ZAŠTITA VODA

### 1. ZABRANE I OGRANIČENJA

#### Član 19.

##### ( Opšta zaštita voda )

Pravno i fizičko lice može koristiti vodu, ispuštati otpadne vode u površinske vode i vodno dobro ili vršiti druge aktivnosti i zahvate, samo uz prethodno pribavljen vodni akt, za koje je ovim zakonom propisana obaveza pribavljanja vodnog akta i u skladu sa tim vodnim aktom.

Pravno i fizičko lice dužno je po isteku roka važenja vodne saglasnosti za vađenje materijala dovesti korito i obale vodotoka u stanje predviđeno vodnim aktom.

#### Član 20.

##### ( Opšta obaveza odvodnje i tretmana otpadnih voda )

Fizičko i pravno lice je dužno otpadnu vodu ispuštati u javni kanalizacioni sistem ili na drugi način, u skladu sa odlukom o odvodnji otpadnih voda.

Odluka iz stava 1. ovog člana sadrži naročito: odredbe o načinu odvodnje otpadnih voda, obavezu priključenja na javni kanalizacioni sistem, uslove i način ispuštanja otpadnih voda na područjima na kojima nije izgrađen takav sistem, obavezu posebnog odlaganja i odstranjivanja opasnih i drugih materija, te obavezu održavanja javnih kanalizacionih sistema.

Odluku iz stava 1. ovog člana na području grada odnosno općine donosi gradsko odnosno općinsko vijeće.

Odluku o odvodnji otpadnih voda s područja više općina Kantona donosi Vlada Kantona, a prijedlog odluke utvrđuju nadležne općine.

## **Član 21.**

### **( Septičke jame )**

Pravna lica i fizička lica, vlasnici stambenih i privrednih objekata kao i vikend kuća koje se grade van naseljenih područja u kojima nije izgrađen vodni objekat za zaštitu voda dužni su izgraditi nepropusne septičke jame i na iste priključiti stambene i privredne objekte, odnosno vikend kuće i obezbjediti čišćenja septičkih jama prema potrebi, a najmanje jednom godišnje od strane specijalizovanog pravnog lica.

## **2. ZAŠTIČENA PODRUČJA**

### **Član 22.**

#### **( Zone sanitarne zaštite u planovima upravljanja vodama )**

Zone sanitarne zaštite utvrđene odlukom o zaštiti izvorišta, kao i prostor rezervisan za uspostavljanje zona sanitarne zaštite za izvorišta koja se koriste i za koje nije donesena odluka, unose se u plan upravljanja vodama.

### **Član 23.**

#### **( Odluka o zaštiti izvorišta )**

Zone sanitarne zaštite i zaštitne mjere utvrđuje gradska, odnosno općinska služba uprave nadležna za vode ( u daljem tekstu: Gradska ili Općinska služba ), na čijem se području nalazi izvorište, **odnosno vodozahvat.**

Odluku o zaštiti izvorišta čije se zone sanitarne zaštite prostiru na području jednog grada ili općine donosi gradsko, odnosno općinsko vijeće.

Odluku o zaštiti izvorišta čije se zone sanitarne zaštite prostiru na području više gradova ili općina u sastavu Kantona donosi Vlada kantona, a prijedlog odluke utvrđuju nadležne općine.

Pravna i fizička lica dužna su pridržavati se Odluke o zaštiti izvorišta.

Donosilac odluke o zonama sanitarne zaštite i zaštitnim mjerama jedan primjerak odluke dostavlja Ministarstvu.

### **Član 24.**

#### **( Vodna tijela namijenjena rekreaciji )**

Kupalište je područje za javnu rekreaciju na vodi (plivanje i dr.) i područje na kome nije zabranjeno kupanje, koje se tradicionalno koristi za tu namjenu.

Kupalište proglašava općina, u skladu sa odredbama federalnog zakona.

Kupališta iz stava 1. ovog člana unose se u plan upravljanja vodama i prostorne planove.



## **VII. UREĐENJE VODOTOKA I DRUGIH VODA I ZAŠTITA OD ŠTETNOG DJELOVANJA VODA**

### **Član 25.**

#### **( Obaveze nadležnih nivoa vlasti )**

Kanton, grad i općina osiguravaju uređenje vodotoka i drugih voda u skladu sa članom 4. i 5. ovog zakona, svako u okviru svoje nadležnosti.

Kanton, grad, općina i pravna lica osiguravaju izgradnju, rekonstrukciju i održavanje vodnih objekata iz članova 10. do 14. ovog zakona, svako u okviru svoje nadležnosti, na način propisan ovim zakonom.

### **Član 26.**

#### **( Zaštita od štetnog djelovanja voda )**

U cilju zaštite od štetnog djelovanja voda, Kanton, grad i općina na ugroženom području osiguravaju, svako u okviru svoje nadležnosti prema odredbama ovog i federalnog zakona, planiranje mjera zaštite, gradnju i upravljanje zaštitnim vodnim objektima, a naročito gradnju nasipa, brana, pregrada, objekata za stabilizaciju dna i obala, objekata za odvođenje unutrašnjih voda i dr.

Mjere i aktivnosti iz stava 1. ovog člana provode se i izvan ugroženog područja, sve do nivoa dijela riječnoga bazena na području Kantona, ako se njima povećava stepen zaštite.

Ciljevi zaštite od štetnog djelovanja voda moraju biti sadržani i u drugim sektorskim planovima u skladu sa odredbama federalnog zakona.

Mjere i aktivnosti zaštite od poplava dijele se na sljedeće faze: fazu planiranja i pripremnu fazu, fazu aktivne obrane od poplava i fazu sanacije posljedica štetnog djelovanja voda.

### **Član 27.**

#### **( Faza aktivne odbrane od poplava )**

Za vrijeme neposredne opasnosti od pojave velikih (poplavnih) voda, Kanton, grad i općina osiguravaju, svako u okviru svoje nadležnosti prema odredbama ovog zakona provođenje mjera aktivne odbrane od poplava.

#### **Mjere iz stava 1. ovog člana su naročito:**

1. mjere na ugroženim područjima i zaštitnim vodnim objektima kojima se sprječava nastanak težih posljedica štetnoga djelovanja voda,

2. povećan nadzor nad zaštitnim objektima i na ugroženim područjima,
3. odstranjivanje naplavina u cilju povećanja kapaciteta protočnosti riječnog korita,
4. provođenje privremenih mjera kao što je postavljanje odbrambenog nasipa, nasipanje, saniranje proboja i dr.

Kod provođenja aktivne faze odbrane od poplava potrebno je poduzeti najveće moguće mjere zaštite zaštitnih vodnih objekata i uređaja, kao i najveće moguće mjere za očuvanje karakteristika ekosistema i prirodnih vrijednosti.

Ministar na osnovu odredbi federalnog zakona, donosi plan o mjerama i načinu njihovog provođenja, za područja uz površinske vode II. kategorije na teritoriji Kantona.

## **VIII. INFORMACIONI SISTEM VODA ( I S V )**

### **Član 28.**

#### **( Vodenje informacionog sistema voda )**

Za potrebe vođenja informacionog sistema voda na području Kantona vodi se:

- vodni katastar,
- vodna knjiga,
- evidencija o izdatim koncesijama na vodama i vodnom dobru,
- evidencija o inspekcijskim pregledima,
- i ostala dokumentacija.

### **Član 29.**

#### **( Vodni katastar )**

Vodni katastar čine katastri:

- voda,
- vodnog dobra i vodnih objekata,
- uređenja i zaštite od štetnog djelovanja voda,
- korištenja voda,
- zaštite voda,
- ostale vodne dokumentacije.

### **Član 30.**

#### **( Vodna knjiga )**

U vodnoj knjizi evidentiraju se svi podaci o izdatim vodnim aktima i nalozima. Vodna knjiga sastoji se od upisnika, zbirke isprava i tehničke dokumentacije. Vodnu knjigu vode Ministarstvo i općina, nadležni za izdavanje vodnih akata. Ministarstvo je dužno dostaviti kopiju izdatog vodnog akta agenciji za vode, a općina i Ministarstvu i Agenciji za vode.

## **Član 31.**

### **( Evidencija o izdatim koncesijama na vodama i vodnome dobru )**

Evidencija o izdatim koncesijama na vodama i vodnom dobru sadrži podatke o odlukama i ugovorima o koncesijama na vodama i vodnom dobru.

Ministarstvo je dužno dostaviti kopiju dokumentacije o dodjeli koncesije nadležnoj agenciji za vode **i općinama na čijoj se teritoriji nalazi vodno dobro.**

## **Član 32.**

### **( Evidencija o inspekcijskim pregledima )**

Vodna inspekcija dužna je dostaviti kopiju predmeta o inspekcijskome pregledu nadležnoj agenciji za vode.

## **Član 33.**

### **( Obaveza ustupanja podataka i pristup informacijama ISV )**

Ministarstvo, grad, općina i druge institucije nadležne za vode, kao i organi, institucije i druga fizička i pravna lica koja posjeduju podatke značajne za upravljanje vodama imaju obavezu ustupiti te podatke agenciji za vode, bez naknade.

Agencija za vode, na zahtjev Ministarstva, grada i općine daje traženu informaciju iz informacionog sistema voda (u daljem tekstu: ISV), bez naknade.

Agencija za vode, na zahtjev pravne ili fizicke osobe, izdaje traženu informaciju iz ISV uz naknadu, u skladu sa Zakonom o slobodi pristupa informacijama u Federaciji Bosne i Hercegovine ("Službene novine Federacije BiH", broj 32/01).

## **IX. VODNI AKTI**

## **Član 34.**

### **( Vrste vodnih akata )**

Radi osiguranja upravljanja vodama i osiguranja pravičnog pristupa vodi svim pravnim i fizičkim licima ovim zakonom propisuje se način ostvarivanja prava na vodu izdavanjem vodnih akata.

Vodni akti u smislu ovog zakona su:

- a) prethodna vodna saglasnost,
- b) vodna saglasnost, i
- c) vodna dozvola

## Član 35.

### ( Podjela nadležnosti izdavanja vodnih akata )

Ministarstvo izdaje vodne akate iz člana 34. stav 2. ovog zakona za:

1. **zahvatanje vode u količini od 2 litra do 10 litara u sekundi;**
2. ispuštanje otpadnih voda za naselja koja imaju do 2000. stanovnika,
3. vađenje materijala iz površinskih voda II. kategorije;
4. izgradnju hidroelektrane za proizvodnju električne energije, kada je postrojenje locirano na površinskim vodama II. kategorije, snage do 5 MW;
5. formiranje akumulacije koja je locirana na površinskim vodama II. kategorije i nalazi se na području Kantona;
6. izgradnju objekata za zaštitu od poplava na površinskim vodama II. kategorije, ako te aktivnosti ne utječu na površinske vode I. kategorije.
7. izgradnju regionalnih i lokalnih saobraćajnica, uključujući i šumske puteve;
8. izgradnju mostova i drugih objekata iznad ili u površinskim vodama II kategorije,
9. uređenje vodotoka na površinskim vodama II kategorije,
10. ispuštanje otpadnih voda pojedinačnih privrednih i drugih objekata koje se vrši putem septičkih jama.

Općina izdaje vodne akte za:

1. **zahvatanje vode u količini do 2 litra u sekundi**
2. građenje ili rekonstrukciju objekata za korištenje vodnih snaga, (za pogon strojeva, vodenice, stupe i sl.), osim za proizvodnju električne energije,
3. ispuštanje otpadnih voda pojedinačnih stambenih objekata i vikend kuća, koje se vrši putem septičkih jama.

## Član 36.

Na vodne akte iz člana 34. i 35. ovog zakona primjenjuju se odgovarajuće odredbe o vodnim aktima, federalnog zakona i podzakonskih akata donesenih na osnovu federalnog zakona.

## X. IZGRADNJA, KORIŠTENJE, ZAŠTITA, ODRŽAVANJE I UPRAVLJANJE MJESNIM VODOVODIMA

## Član 37.

### ( Mjesni vodovodi )

Vodnim objektima iz člana 12. stav 5. ovog zakona smatraju se mjesni vodovodi.

**Upravljanje mjesnim vodovodima koji služe za snabdijevanje vodom za piće do 500 stanovnika vrše korisnici vodovoda ili mjesna zajednica, dok upravljanje mjesnim vodovodom koji služi za snabdijevanje vodom za piće preko 500 stanovnika općinsko odnosno gradsko vijeće svojom odlukom povjerava na upravljanje pravnom licu u skladu sa propisima o komunalnoj djelatnosti.**

### **Član 38.**

#### **( Snabdijevanje vodom za piće )**

Izvorišta voda koja se zahvataju radi snabdijevanja vodom za piće stanovništva putem mjesnih vodovoda moraju imati dovoljne količine zdravstveno ispravne vode za piće, kako bi se u svako doba godine moglo obezbijediti neprekidno snabdijevanje vodom stanovništva.

Kaptaža i rezervoari koji su, u smislu ovog zakona, sastavni dio mjesnog vodovoda, a koji služe za prihvatanje i akumuliranje vode za piće, moraju imati propisane izolacije i ostale potrebne uređaje.

Kapacitet rezervoara mjesnog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.

Mjesni vodovod mora imati ugrađen i propisno baždaren uređaj za mjerenje količina iskorištene vode na odvodu iz rezervoara, a ako ima više odvoda iz rezervoara, na svakom odvodu.

### **Član 39.**

#### **( Investitori za izgradnju mjesnog vodovoda )**

Investitor za izgradnju mjesnog vodovoda može biti mjesna zajednica **ili drugo pravno lice, grupa građana ili građanin.**

### **Član 40.**

#### **( Dokumenti potrebni za izgradnju mjesnog vodovoda )**

Izgradnja mjesnog vodovoda vrši se na osnovu izdate urbanističke saglasnosti odnosno odobrenja za građenje po propisima o prostornom uređenju odnosno građenju, uz prethodno pribavljanje **prethodne vodne saglasnosti i vodne saglasnosti.** Pored dokumentacije predviđene odredbama federalnog zakona investitor je dužan da priloži i slijedeću dokumentaciju:

1. o izdašnosti izvora,
2. o sadašnjoj i budućoj potrebnoj količini vode za piće,
3. o zdravstvenoj ispravnosti vode za piće,
4. dokaz da objekat odgovara propisanim mjerama za obezbjeđenje zdravstvene ispravnosti vode za piće i za zaštitu izvorišta od zagađivanja,

5. dokumentaciju o zaštitnim zonama (član 22.) i
6. projektna dokumentacija najmanje na nivou idejnog projekta **za zahvatanje vode u količini do 2 litra u sekundi**

## **Član 41.**

### **( Izgradnja i rekonstrukcija mjesnog vodovoda )**

Izgradnja ili rekonstrukcija mjesnog vodovoda vrši se na način i pod uslovima određenim u izdatoj vodnoj saglasnosti i odobrenju za građenje za taj objekat.

## **Član 42.**

### **( Vodna dozvola za mjesni vodovod )**

Po izvršenoj izgradnji ili rekonstrukciji mjesnog vodovoda, a prije izdavanja odobrenja za upotrebu po propisima o prostornom uređenju odnosno građenju, pribavlja se vodna dozvola.

Uz zahtjev za izdavanje vodne dozvole za mjesni vodovod za koji su investitori grupa građana, podnosi se i pismeni ugovor o održavanju i iskorištavanju mjesnog vodovoda i regulisanju svih drugih pitanja od značaja za mjesni vodovod, koji potpisuju svi investitori tog objekta koji ovjerava notar i čiji se primjerak dostavlja na korištenje općini. Mjesni vodovod mora se koristiti u skladu sa vodnom dozvolom i pod uslovima određenim u toj dozvoli.

## **Član 43.**

### **( Priključenje na mjesni vodovod )**

Licima koja nisu učestvovala u izgradnji mjesnog vodovoda, može se odobriti priključak na mjesni vodovod na osnovu vodne saglasnosti koju izdaje općina. Vodnom saglasnošću odobrit će se priključak na mjesni vodovod s obzirom na količinu vode za piće, ako može da zadovolji i potrebe interesanata i ako se njegovo snabdijevanje vodom za piće ne može izvršiti na drugi (ekonomičan i racionalan) način.

Lice kome je vodnom saglasnošću odobreno priključenje na mjesni vodovod dužno je prije priključenja, odnosno korištenja vode, putem ugovora sa vlasnicima mjesnog vodovoda, regulisati plaćanje srazmjernog dijela troškova izgradnje mjesnog vodovoda i srazmjernog dijela troškova održavanja i iskorištavanja mjesnog vodovoda.

Srazmjerni dio troškova koje lice kojem je vodnom saglasnošću odobreno priključenje na mjesni vodovod treba da plati, u smislu stava 3. ovog člana, ne može biti veće od učešća svakog pojedinog investitora u izgradnji ili rekonstrukciji

mjesnog vodovoda u troškovima održavanja i iskorištavanja tog objekta. Ako lice kojem je vodnom saglasnošću odobreno priključenje na mjesni vodovod ne zaključi ugovor sa vlasnicima mjesnog vodovoda o troškovima priključenja na mjesni vodovod odnosno korištenje vode, u smislu stava 3. ovog člana, spor rješava nadležni sud.

#### **Član 44.**

##### **( Obezbjeđenje sredstava za održavanje mjesnog vodovoda )**

Građani koji su mjesni vodovod izgradili vlastitim sredstvima dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom i za vršenje minimalnog broja propisanih pregleda zdravstvene ispravnosti vode za piće iz tih objekata.

#### **Član 45.**

Ukoliko se ustanovi da vlasnici mjesnog vodovoda ne izvršavaju obavezu iz člana 44. ovog zakona, općina će narediti izvršavanje tih obaveza i odrediti rok za njihovo izvršenje, odnosno postupanje u skladu sa uslovima i obavezama utvrđenim u vodnoj dozvoli izdatoj za taj objekat.

Ako se ustanovi da građani vlasnici mjesnog vodovoda nisu izvršili svoje obaveze ili ih nisu izvršili u roku i u skladu sa rješenjem iz stava 1. ovog člana, općina će izdati nalog.

#### **Član 46.**

##### **( Zaštita izvorišta mjesnog vodovoda )**

Zaštita izvorišta mjesnih vodovoda vrši se u skladu sa članom 22. ovog zakona.

#### **Član 47.**

Zabranjeno je neovlaštenim licima otvaranje i zatvaranje armatura, instalacija, hidranata i ostalih uređaja mjesnih vodovoda, izuzev u slučajevima kada je to nužno u cilju sprječavanja šteta većih razmjera.

#### **Član 48.**

Ministarstvo i općina su dužni da ustroje i trajno vode evidenciju o vodovodima iz člana 12. stav 1. ovog zakona, svako u domenu svoje nadležnosti.

U evidenciju iz stava 1. ovog člana unose se narocito podaci:

- Naziv vodovoda,

- Naziv kantona, općine, mjesne zajednice,
- Broj i datum izdavanja vodne saglasnosti,
- Broj i datum izdavanja urbanističke saglasnosti,
- Broj i datum izdavanja odobrenja za građenje,
- Broj i datum izdavanja vodne dozvole,
- Broj domaćinstava koji koriste vodovod,
- Broj naknadno priključenih domaćinstava na mjesni vodovod i
- Ugovor iz člana 42. stav 2. ovog zakona.

Sve isprave i podaci koji su poslužili kao osnov za upis u evidenciju iz stava 1. i 2. ovog člana vode se u zbirci isprava i sastavni su dio te evidencije.

Zbirke isprava iz stava 3. ovoga člana vode se posebno za svaku općinu s posebnim omotima za svako naselje odnosno Mjesnu zajednicu i unutar toga za svaki objekat, u koji se ulažu sve isprave i podaci o objektu.

## **XI. ORGANIZACIJA UPRAVLJANJA VODAMA**

### **Član 49.**

Ministarstvo izvršava poslove i zadatke utvrđene ovim zakonom, a naročito:

1. izradu godišnjih programa utroška sredstava vodnih naknada na području Kantona, u skladu sa planovima razvoja vodoprivrede na području Federacije,
2. organizaciju, odnosno vršenje svih poslova i zadataka na izvršavanju programa iz tačke 1. ovog člana,
3. organizaciju istražnih radova, izradu investiciono-tehničke i druge dokumentacije, i vršenje revizije te dokumentacije,
4. vršenje svih investicionih poslova i nadzor nad izgradnjom vodnih objekata iz programa razvoja vodoprivrede Kantona,
5. planiranje i prikupljanje sredstava za finansiranje poslova i zadataka iz programa razvoja vodoprivrede Kantona,
6. izdaje vodne akte u skladu sa ovim zakonom
7. vođenje informacionog sistema voda .
8. saradnju sa općinama, privrednim društvima i drugim pravnim licima na području Kantona,
9. saradnju sa Agencijom za vodno područje rijeke Save kod izrade planova razvoja vodoprivrede Kantona, izdavanja vodnih akata,
10. pribavljanje stručnih mišljenja kod donošenja vodnih akata u nadležnosti Kantona i općina, i o drugim pitanjima u oblasti vodoprivrede na području Kantona,
11. vršenje i drugih poslova i zadataka u vezi sa ovim zakonom.

### **Član 50.**

Ministarstvo je odgovorno za zakonito i racionalno korištenje sredstava koja su mu obezbijedena i stavljena na raspolaganje za obavljanje poslova i zadataka utvrđenih federalnim i ovim zakonom.



## **XII. FINANSIRANJE UPRAVLJANJA VODAMA**

### **Član 51.**

#### **( Izvori sredstava )**

Sredstva za obavljanje poslova i zadataka određenih ovim zakonom osiguravaju se iz:

1. dijela opće vodne naknade i posebnih vodnih naknada koje po odredbama federalnog zakona, pripadaju Kantonu;
2. prihoda po osnovu zakupa javnoga vodnog dobra na površinskim vodama II kategorije;
3. Budžeta Kantona i općine;
4. sredstva koja udružuju općine, privredna društva, druga pravna lica i građani za finansiranje namjena iz člana 52. ovog zakona.
5. kreditnih sredstava;
6. sredstava osiguranih posebnim zakonom;
7. donacija i ostalih sredstava u skladu sa zakonom.

### **Član 52.**

#### **( Korištenje prihoda )**

Prihodi iz člana 51. ovog zakona koriste se za:

1. finansiranje poslova i zadataka iz člana 49. ovog zakona
2. sufinansiranje izgradnje i održavanje vodnih objekata iz člana 9., stav 1. ovog zakona, osim objekata iz tačke 3., alineje 2. 4. i 5. tog člana.
3. ostale aktivnosti vezane za poslove upravljanja vodama (izrada tehničke dokumentacije, podloga za izdavanje koncesija i dr.) u skladu sa godišnjim planom i programom Ministarstva.

## **XIII. NADZOR NAD PROVOĐENJEM OVOG ZAKONA**

### **1. Upravni nadzor**

#### **Član 53.**

Ministarstvo vrši upravni nadzor nad provođenjem ovog zakona i propisa donesenih na osnovu ovog zakona.

Općina vrši upravni nadzor nad provođenjem propisa donesenih na osnovu ovog zakona, a u okviru svojih nadležnosti.

Izuzetno od odredbe stava 1. ovog člana, resorno ministarstvo nadležno za poslove zdravstva obavlja nadzor nad provođenjem ovog zakona u dijelu koji se odnosi na zdravstvenu ispravnost vode za piće.

## Član 54.

Protiv rješenja o izdavanju vodnih akata iz člana 34. a u vezi sa članom 35. stav 1. ovog zakona, dozvoljena je žalba. Po žalbi odlučuje Federalno ministarstvo.

Protiv rješenja o izdavanju vodnih akata iz člana 34., a u vezi sa članom 35. stav 2. ovog zakona, dozvoljena je žalba. Po žalbi odlučuje Ministarstvo.

## 2. Organizacija vršenja inspeksijskoga nadzora

### Član 55.

#### ( Zajednička odredba )

Inspeksijski nadzor nad provođenjem ovog zakona i propisa donesenih na osnovu ovog zakona provodi se u skladu sa odredbama ovog zakona, Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i Zakona o inspekcijama u Federaciji BiH („Službene novine FBiH“, broj: 69/05), koje se odnose na inspeksijski nadzor.

### Član 56.

#### ( Kantonalna i općinska vodna inspekcija )

Inspeksijski nadzor nad provedbom ovog zakona i propisa donesenih na osnovu ovog zakona, **koji su ovim Zakonom stavljeni u nadležnost Kantona** provodi Ministarstvo, putem kantonalne vodne inspekcije.

**Inspeksijski nadzor nad provođenjem ovog Zakona i propisa donesenih na osnovu ovog Zakona, koji su stavljeni u nadležnost općina, provode općine putem općinske vodne inspekcije**

### Član 57.

#### ( Inspeksijski postupci )

Kada utvrdi da postoji povreda ovog zakona, propisa ili drugih akata donesenih na osnovu ovog zakona, kantonalni i **općinski** vodni inspektor u zapisniku konstatuje nepravilnosti ili nedostatak i rješenjem nalaže mjere i rok za njihovo otklanjanje.

Pored ovlaštenja i dužnosti utvrđenih federalnim zakonom i drugim zakonom, u slučaju iz stava 1. ovog člana, **inspektori iz stava 1. ovog člana ovlašteni su i dužni da:**

- a) narediti obustavljanje izvođenja radova, ako se vrše protivno vodnom aktu ili se vrše bez vodnog akta, a propisana je obaveza njegovog pribavljanja,

- b) narediti u saradnji sa građevinsko-urbanističkom inspekcijom, uklanjanje sagrađenog objekta ili postrojenja izgrađenog bez vodnog akta, ako u roku od 60 dana nije pribavljen vodni akt,
- c) narediti privremenu obustavu rada, odnosno obavljanje djelatnosti pravnog lica ili njegovog dijela, ako utvrdi da otpadne vode sadrže opasne materije u količini većoj od dozvoljene ili se zahvataju veće količine vode od dozvoljenih,
- d) zabraniti preduzimanje radnji, koje nisu dozvoljene ovim Zakonom.

## **Član 58.**

### **( Žalbe na rješenje inspektora )**

Protiv rješenja kantonalnog **odnosno općinskog** vodnog inspektora, koje je doneseno na osnovu ovog zakona i propisa donesenih na osnovu ovog zakona žalba se izjavljuje Ministarstvu, putem kantonalne **odnosno općinske** vodne inspekcije. Žalba protiv rješenja kantonalnog vodnog inspektora odlaže izvršenje rješenja, osim u slučajevima utvrđenim federalnim zakonom i drugim zakonom kada se donosi pisano ili usmeno rješenje i odmah naređuje njegovo izvršenje bez odlaganja.

## **Član 59.**

### **( Saradnja vodnih inspektora )**

**Vodni inspektori dužni su međusobno saradivati i informisati se o pojavama, problemima i načinu rješavanja pojedinih slučajeva. Inicijativu za saradnju može pokrenuti svaki od vodnih inspektora.**

**Saradnja iz stava 1. ovog člana ostvaruje se i sa federalnom vodnom inspekcijom.**

**Vodna inspekcija u svom radu saraduje i s drugim inspekcijama i tijelima u vršenju svojih ovlaštenja.**

## **XIV. KAZNENE ODREDBE**

### **Član 60.**

#### **( Prekršaji )**

Novčanom kaznom u iznosu od 1000,00 KM do 5.000,00 KM kaznit će se za prekršaj pravno lice ako:

- 1.) ne održava u funkcionalnom stanju i ne koristi vodne objekte u skladu sa njihovom prirodom i namjenom ( član 14.) stav 1.,
- 2.) uslučaju prestanka upotrebe vodnog objekta ne postupi u skladu sa vodnim aktom, odnosno ne održava objekat u stanju koje neće prouzrokovati štete režimu voda itrećim licima ( član 14. stav 2.),
- 3.) ne brine o čuvanju vodnih objekata i uređaja na njima od slučajnog ili namjernog oštećenja ili uništenja ( Član14, stav 5.),

- 4.) ne osigura stalni i sistematski pregled vode i ne poduzme mjere za osiguranje zdravstvene ispravnosti vode za piće i tehničke ispravnosti uređaja ( Član 18. stav 1.),
- 5.) postupa suprotno odredbama člana 19.
- 6.) postupa suprotno odredbi člana 20., stav 1.
- 7.) postupa suprotno odredbi člana 21.
- 8.) postupa suprotno odredbi člana 23., stav 4.
- 9.) lice kojem je vodnom dozvolom odobren priključak na mjesni vodovod, te korištenje vode s toga vodovoda, ometa u priključenju na mjesni vodovod ili mu ometa snabdijevanje vodom iz mjesnog vodovoda, (član 43.)
- 10.) ne osigura finansijska sredstva i druge uslove iz člana 44. i 45. stav 1.,
- 11.) ne postupi po rješenju vodnog inspektora iz člana 57., stav 1.,
- 12.) ne podnese zahtjev za izdavanje nove vodne dozvole u propisanom roku iz člana 66.,stav 1.
- 13.) ne podnese zahtjev za izdavanje vodne dozvole u propisanom roku iz člana 67.,
- 14.) ne izgradi nepropusnu septičku jamu i na istu ne priključi stambeni ili privredni objekat u roku iz člana 69.

Za prekršaj iz stava 1. ovoga člana kaznit će se i odgovorna osoba u pravnom licu novčanom kaznom u iznosu od 300,00 do 1000,00 KM.

### **Član 61.**

Novčanom kaznom u iznosu od 200,00 KM do 500,00 KM kaznit će se za prekršaj fizičko lice ako:

- 1.ne održava u funkcionalnom stanju i ne koristi vodne objekte u skladu sa njihovom prirodom i namjenom ( član 14. stav 1.),
- 2.u slučaju prestanka upotrebe vodnog objekta ne postupi u skladu sa vodnim aktom, odnosno ne održava objekat u stanju koje neće prouzrokovati štete režimu voda i trećim licima ( član 14. stav 2.),
- 3.ne brine o čuvanju vodni objekat i uređaja na njima od slučajnog ili namjernog oštećenja ili uništenja ( član 14. stav 5.),
- 4.ne osigura stalni i sistematski pregled vode i ne poduzme mjere za osiguranje zdravstvene ispravnosti vode za piće i tehničke ispravnosti uređaja ( Član 18.stav 2.),
- 5.postupa suprotno odredbama člana 19.
- 6.postupa suprotno odredbi člana 20., stav 1.
- 7.postupa suprotno odredbi člana 21.
- 8.postupa suprotno odredbi člana 23., stav 4.
- 9.sa svim ostalim vlasnicima mjesnog vodovoda ne zaključi napismeno ugovor iz člana 42. stav 2. ovog zakona.
- 10.lice kojem je vodnom dozvolom odobren priključak na mjesni vodovod, te korištenje vode s toga vodovoda, ometa u priključenju na mjesni vodovod ili mu ometa snabdijevanje vodom iz mjesnog vodovoda, (član 43.)
- 11.ne osigura finansijska sredstva i druge uslove iz člana 44. i 45. stav 1.,
- 12.neovlašteno pristupi u područje zaštitne zone mjesnog vodovoda ( član 46),
- 13.na objektima mjesnog vodovoda obavlja zabranjene radnje ( član 47.)

- 14.ne postupi po rješenju vodnog inspektora iz člana 57., stav 1.,  
15.ne podnese zahtjev za izdavanje nove vodne dozvole u propisanom roku člana 66.,stav 1.,  
16.ne podnese zahtjev za izdavanje vodne dozvole u propisanom roku iz člana 67.,  
17.ne izgradi nepropusnu septičku jamu i na istu ne priključi stambeni ili privredni objekat u roku iz člana 69.

## **XV. PRIJELAZNE I ZAVRŠNE ODREDBE**

### **Član 62.**

#### **( Planski dokumenti )**

Do donošenja strategije upravljanja vodama u skladu sa odredbama federalnog zakona kao planski dokumenti za upravljanje vodama u Kantonu koristit će se odgovarajući planovi i programi razvitka vodoprivrede i pojedinih oblasti vodoprivrede (zaštita od štetnog djelovanja voda, zaštita voda i korištenje voda), doneseni do dana stupanja na snagu ovog zakona.

### **Član 63.**

#### **( Ranije izdati vodoprivredni akti )**

Vodoprivredne dozvole koje su izdate do dana početka rada agencija za vode usaglasit će se s odredbama ovog zakona, u roku do pet godina od dana stupanja na snagu ovog zakona.

Vodoprivredni uslovi koji su izdati do dana početka rada agencija za vode usaglasit će se sa odredbama ovog zakona pri izdavanju vodne saglasnosti.

Vodoprivredne saglasnosti koje su izdate do dana početka rada agencija za vode usaglasit će se s odredbama ovog zakona pri izdavanju vodnih dozvola.

Nosioci prava iz vodoprivrednog akta iz stava 1. ovog člana dužni su podnijeti zahtjev za preispitivanje vodne dozvole, u roku do dvije godine od dana stupanja na snagu ovog zakona.

U slučaju da zahtjev iz stava 4. ovog člana nije podnesen u roku iz stava 4. ovog člana, vodoprivredni akt iz stava 1. ovog člana prestaje da važi.

Odredbe iz stava 1. ovog člana ne odnose se na vodoprivredne dozvole koje važe pet godina ili manje, od dana stupanja na snagu ovog zakona.

### **Član 64.**

#### **( Neriješeni zahtjevi za izdavanje vodoprivrednih akata )**

Zahtjevi za izdavanje vodoprivrednih akata koji su podneseni nadležnom organu do 01.01.2008.godine, rješavat će se u skladu sa Zakonom o vodama ("Službene novine Federacije BiH", broj 18/98), Zakonom o vodama Srednjobosanskog kantona

(„Službene novine Srednjobosanskog kantona“, broj: 14/02) i propisima donesenim na osnovu ovih zakona.

## **Član 65.**

### **( Postupci po žalbama )**

Postupci po žalbama koje nisu riješene do 01.01.2008. godine, riješavat će se u skladu sa Zakonom o vodama ("Službene novine Federacije BiH", broj 18/98) Zakonom o vodama Srednjobosanskog kantona („Službene novine Srednjobosanskog kantona“, broj: 14/02) i propisima donesenim na osnovu ovih zakona.

## **Član 66.**

### **( Postojeći objekti i aktivnosti za koje nije izdat vodoprivredni akt )**

Vlasnici, odnosno korisnici postojećih objekata i postrojenja koja iskorištavaju vode ili ispuštaju otpadne vode i druge opasne i štetne materije u vode, za koje nije pribavljena vodoprivredna dozvola do dana stupanja na snagu ovog zakona, dužni su da podnesu zahtjev za izdavanje vodne dozvole u roku od šest mjeseci od dana stupanja na snagu ovog zakona.

U slučaju da zahtjev iz stava 1. ovog člana nije podnesen u predviđenom roku, rješenjem kantonalne vodne inspekcije zabraniće se upotreba objekata odnosno postrojenja iz stava 1. ovog člana.

## **Član 67.**

### **( Rok pribavljanja vodne dozvole za postojeće mjesne vodovode )**

Vlasnici postojećih mjesnih vodovoda dužni su da za iste u roku od godinu dana od dana stupanja na snagu ovog zakona pribave vodnu dozvolu.

## **Član 68.**

### **( Rok za uspostavu evidencije o mjesnim vodovodima i javnim bunarima )**

Općina je dužna najkasnije u roku od godinu dana od dana stupanja na snagu ovog zakna da ustroji evidenciju o mjesnim vodovodima ( član 48. )

## **Član 69.**

### **( Rok za izgradnju septičkih jama za postojeće objekte )**

Pravna i fizička lica, vlasnici stambenih i privrednih objekata, kao i vikend kuća, koje su podignute van naseljenih mjesta prije stupanja na snagu ovog zakna dužni su da

izgrade nepropusne septičke jame i na iste priključe stambene i privredne objekte odnosno vikend kuće u roku od 2. godine od dana stupanja na snagu ovog zakona.

## **Član 70.**

### **( Primjena odredbi federalnog zakona )**

Na sva pitanja koja nisu regulisana ovim zakonom primjenjuju se odredbe federalnog zakona.

## **Član 71.**

### **( Prestanak primjene zakona )**

Danom stupanja na snagu ovog zakona prestaje da važi Zakon o vodama Srednjobosanskog kantona („Službene novine Srednjobosanskog kantona“, broj: 14/02).

## **Član 72.**

### **( Stupanje na snagu )**

Ovaj zakon stupa na snagu osmog dana od dana objavljivanja u “Službenim novinama Srednjobosanskog kantona“.

**Broj:** \_\_\_\_\_

**Travnik,** \_\_\_\_\_

**PREDSJEDAVAJUĆI SKUPŠTINE  
SREDNJOBOSANSKOG KANTONA**

**Mirko Batinić, s.r.**

